

Newspaper	UTUSAN MALAYSIA
Date	10 AUGUST 2016

## Dr. Mahathir diingatkan jangan hina kaum India

UM - 10/8/2016

**KUALA LUMPUR 9 Ogos** - Bekas Perdana Menteri, Tun Dr. Mahathir Mohamad diingatkan agar tidak mengeluarkan sebarang kenyataan berbaur penghinaan terhadap masyarakat India di negara ini.

Bekas Bendahari Agung MIC, Datuk R. Ramanan berkata, rakaman video mengenai ucapan Dr. Mahathir dalam satu program di Langkawi baru-baru ini adalah keterlaluan dan jelas menghina kaum India.

Perkara itu, jelas beliau, tidak sepatutnya berlaku dan pemimpin MIC khususnya Presiden parti, Datuk Seri S. Subramaniam sepatutnya mempertahankan kaum India dalam isu tersebut.

Menurut Ramanan, kaum India sangat terganggu dengan kenyataan bekas Perdana Menteri itu, justeru Subramaniam tidak sepatutnya berdiam diri berhubung perkara tersebut.

“Dr. Mahathir tidak pernah menyumbang kepada masyarakat India sepanjang 22 tahun pemerintahannya berbanding Perdana Menteri, Datuk Seri Najib Tun Razak yang memberikan pelbagai inisiatif untuk kaum India agar tidak tercicir daripada arus pembangunan negara,” katanya dalam sidang akhbar yang turut dihadiri bekas Naib Presiden MIC, Tan Sri S. Balakrishnan dan bekas Setiausaha Agung MIC, A.K Ramalingam, di sini hari ini.

Mengulas lanjut, Ramanan berkata, tindakan bekas Perdana Menteri itu juga tidak menunjukkan sikapnya sebagai seorang pemimpin yang bertanggungjawab.



**R. RAMANAN**

“Saya rasa pelik dengan tindak-tanduk beliau. Pada pandangan saya, Dr. Mahathir sepatutnya sudah lama bersara daripada politik,” katanya.

Mengulas lanjut, Ramanan berkata, Subramaniam selalu mengangkat dirinya sebagai pemimpin nombor satu yang mewakili suara masyarakat India tetapi apabila berlaku perkara menyentuh sensitiviti mereka, beliau hanya mengunci mulut.

“Subramaniam diminta tidak mengambil jalan selamat dengan mendiamkan diri, tampil dan bidas kenyataan Dr. Mahathir. Sikap Subramaniam ini jelas menunjukkan beliau seorang pemimpin yang lemah,” katanya.